

[Augsburg], 13. Mai 1559

An Johannes Oporinus

UB Basel, Fr. Gr. I 11, fol. 226r.

Steinmann Nr. 718.

Lit.: Husner S. 154 (mit Auszug).

S. P. D. Proximas literas meas ad te scriptas, Heroldum nostrum diligenter curasse existimo. Quare nunc illa non repetam. sed cum Cuspinianum ad te miserim, cuius editio a multis expectatur: puto te studiosis hominibus rem gratam facturum, si Andreeae Althameri explicationem Germaniae adieceris, et eiusdem argumenti alias libellos, cuiusmodi est, Pirckameri Germania, Auentini libellus de proprijs Germanorum nominibus, qualis et a Luthero est editus, sed ἀνωνύμως. commentatus est et Paulus Eberus non inutilia quaedam in Hutteni Arminium et Taciti Germaniam. Sed haec tuae prudentiae committo ἵνα μὴ σὺς τὴν ἀθηνᾶν. Morelij Demosthenici commentarij si editi fuerint, rem gratam feceris, si eos quamprimum ad me miseris. Tales enim fortasse sunt, vt meis annotationibus, quas expectatione operis illius seposui, post decem annorum interuallum non ita pridem resumptas, supersedere possim. Neque verò labore illo me leuatum molestè feram. hac praesertim valetudine, et spe vitae non duratae, cuius reliquum (si quid superesse volunt dij) legendo consumere malo quam scribendo, diris praesertim pontificijs petitus, et fulmine apud superstitiones, quae maxima turba est, non bruto ictus. Eum quoque indicem, quem in Demosthenem ante annos 5. confectum, ad te misi, ad <me> remitti velim, vt in meo Demosthene per puerum meum ad priuatos nostros vsus describatur. Recipies quando voles. Vale. et D. Carino S[alutem] quem iampridem accepto equo ad nos non venire miror. 3 Idus Maij 1559.

Hiero[nymus] Wolfius
Tuus.